

ՋԱՔԱՐՅԱՆՆԵՐԻ ԾԱԳՈՒՄԸ*

Հ. Գ. ՄԱՐԻԱՆՅԱՆ

Ջաքարյանների ծագման երկրորդ՝ Բագրատունիներից սերելու վարկածն արտացոլված է առավել մեծ թվով սկզբնաղբյուրներում, սակայն եռանդուն կերպով քարոզվել է համեմատաբար կարճ ժամանակահատվածում ու արձագանք չի գտել հայ և վրաց միջնադարյան պատմագրության մեջ:

Այս տեսությունը քննելիս նախ անհրաժեշտ է հստակեցնել, թե Ջաքարյաններից ո՞վքեր են Բագրատունի հորջորջվել և ապա պարզել՝ Բագրատունիների ո՞ր տոհմաճյուղի հետ են ազգակցություն փնտրել Հայաստանի նորահայտ տիրակալները:

Ավանդաբար համարվում է, որ իրենց Բագրատունի են անվանել Իվանե աթաբեկը և նրա քույր Վանենին (Նանան)¹: Ուստի վերստին անդրադառնանք սկզբնաղբյուրներին և ճշտենք, թե Ջաքարյաններից ո՞վ և ե՞րբ է հիշատակել իր ազգակցությունը նշանավոր արքայատոհմի հետ: Ժամանակագրական առումով թերևս ամենավաղ ու առավել հայտնի հիշատակությունը պատկանում է Վանենի իշխանուհուն²: Ուսումնասիրողներից Աս. Շահնազարյանցի կարծիքով, Շահնան իրեն համարում էր Բագրատունյաց ցեղից, երևի այն մտքով, որ ինքն ամուսնացած էր Բագրատունի թաղավոր Աբասի հետ³: Բայց ամուսնու տոհմակից դիտվելու համար մի՞թե բավական էր նրա հետ ամուսնացած լինելը: Կյուրիկյանների հետ խնամիական կապերը անսովոր չէին XII դարի հայկական իշխանական տների համար, բայց այդ տոհմերից որևէ մեկը իրեն չի սկսել Կյուրիկյան կամ Բագրատունի անվանել: Եթե Վանենիի և Աբասի երկու տարի տեած ամուսնությունը ընդունելի փաստարկ չէր կարող դիտվել՝ նախալին Բագրատունիների տոհմին դասելու համար, ապա առավել ևս Կյուրիկյանների հետ միակ խնամիական

* Սկիզբը տե՛ս «Պատմա-բանասիրական հանդես», 1992, № 2—3:

¹ Տե՛ս Աս. Շահնազարյանց. Ջաքարյան (Երկայնաբազուկ) տոհմի ծագումը, դադթը դեպի Ձորագետ և նախորդները.—«Շողակաթ», էջմիածին, 1913, էջ 69—70, Շ. Մեթիսաներքաղաքական կացությունը և պաշտոնական կառուցվածքը XII դարի Վրաստանում. Թբիլիսի, 1979, էջ 223—224 (վրացերեն):

² Կ. Ղաֆազարյան. Սանահնի վանքը և նրա արձանագրությունները. Երևան, 1957, էջ 185—186: Պետք է խոստովանել, որ արձանագրությունը մասամբ վնասված է և դժվար է անվերապահորեն եզրակացնել, թե «[ա]ղբին Բագրատունեաց» բառերը վերաբերում են հենց Վանենիին:

³ Աս. Շահնազարյանց. նշվ. աշխ., էջ 70: Ավելի վաղ նույն տեղեկետն է հայտնել Մ. Բրոսսեն (տե՛ս M. Brosset. Additions et éclaircissements a l'Histoire de la Géorgie. S.-Pet., 1851, p. 270.

աղերսը՝ չէ՞ր կարող ելակետ ծառայել նաև մյուս Ձաքարյաններին Բագրատունի հռչակելու համար:

Ամենաուշագրավ փաստն, այնուամենայնիվ, հետևյալն է. Վանենիից ու Իվանեից դառ թագավորական ծագում է վերագրվել նաև նրանց քրոջը՝ Նրջիսին ու, որ ամենակարևորն է, Ձաքարիա ամիրսպասալարին:

Դիմենք համապատասխան փաստերին:

Հաղարծնի սուրբ Գրիգոր եկեղեցու դավթի նշանավոր արձանագրությունը Ձաքարյանների և Բագրատունիների աղագեցությունը շեշտող ամենակարևոր վավերագիրն է: Վիմագրի առաջին մասը՝ «Այս մեր գիր յիշատակի է եւ արձան մշտընդհաւոր որդեաց մեծին Սարգսի, յագգէ Բագրատունեան՝ Իւանէի եւ Զաֆաւէի, յորժամ նախախնամութիւն Աստուծոյ էհաս յաւաւածս եւ ետ... տիրել սէփական ժառանգութեանն նախնեաց մերոց, ետ ի ձեռս մեր յառաջ զանառիկ դղեակն Անբերդ»⁶ իրականում դրված է Ձաքարիայի մահից քիչ անց, Իվանեի կողմից⁷: Այս փրողությունը, սակայն, պատկանում է միայն Իվանեին: Հաղարծնի արձանագրության մեջբերված հատվածը համադրելի է Հաղբատի կարևոր վիմագրերից մեկին, որը գրվել է «յամս անելոյ Աստուծոյ թագաւորաց թագաւորին Գէորգէ, որդոյ մեծ թագաւորին Թամարին, յորոյ ժամանակս եա Աստուած ի ձեռս Բ Խաւազաւածս՝ Զաֆաւէի եւ Իւանէի զսեփական դղեակն մեր զԱնբերդ, զիւնեալն ի նախնեաց մերոց եւ զայլ բազում ամրոցս»⁸. Դժվար չէ տեսնել, որ ընդգծված հատվածները բանաձևային բնույթ ունեն և Բագրատունի-Ձաքարյան տոհմակցության տեսությունը առաջ է քաշվել երկու եղբայրների կողմից: Ավելին, հիմքեր կան կարծելու, որ առաջին հերթին Բագրատունի է հռչակվել Ձաքարեն և միայն Շահնշահի մանկահասակության ժամանակահատվածում է առանձին շշուղիվ Իվանեի թագավորական ծագումը: Այսպես, Գեղարդի գլխավոր եկեղեցու 1215 թ. արձանագրությունում «թագաւորազն», այսինքն՝ Բագրատունի է կոչվում միայն Ձաքարե ամիրսպասալարը: «Ի ժամանակս թագաւորազնոյն Ձաքարէի եւ Իւանէի նորին հարազատի եւ որդոց նոցին Շահնշահի եւ Աւագին» — ասվում է վիմագրում⁹, թեև այն փորագրվել է զորավարի մահից երեք տարի հետո: Նույն ոգով է արտահայտվում 1217 թ. Այրիվանքում ընդօրինակված ձեռագրի հիշատակարանի գրիչը. «Նւյանցելում եռից» ամաց թագաւորազնն՝ մեծն և աջոշակն և ըմբշամարտիկն:

⁴ Ա. Հովհաննիսյանի ենթադրությունը, որի համաձայն «խնամիական նման կապ (նկատի ունի Իվանեի և ենթադրյալ Բագրատունի խոջաքի ամուսնությունը — Ն. Մ.) Բագրատունիների հետ կարող լին ունեցած լինել Իվանեի և Ձաքարեի նախնիները ևս» (տե՛ս Ա. Հովհաննիսյան. Դրվագներ հայ աղատագրական մտքի պատմության. գ. Ա, Երևան, 1957, էջ 155) մնում է ոչ միայն չփաստարկված, այլև քիչ հավանական: XII դարի երկրորդ կեսի Կյուրիկյանների և Ձաքարյանների տոհմածառերն ու խնամիական կապերը լավ հայտնի են, իսկ ինչ վերաբերում է զարի առաջին կեսին, ապա այդ տոհմերն իրենց դիրքով դեռևս բավականաչափ տուրեր տեղեր էին գրավում ավատատիրական աստիճանակարգության մեջ՝ խնամիական առնչություն հաստատելու համար:

⁵ Այս առումով լիովին ուժի մեջ է մնում Կ. Տեր-Մկրտչյանի օրինական հարցը. «Ինչու Կորիկյանների հետ ունեցած խնամությունը իրավունք պիտի տար Ձաքարյաններին Բագրատունի կոչվելու» (Կ. Տեր-Մկրտչյան. Նյութեր հայ մեղիքության մասին. պրակ Բ, Դուխանք և Մելիք-Շահնաղարյանք. էջմիածին, 1914, էջ 22):

⁶ Տե՛ս Դիվան հայ վիմագրության, VI, Երևան, 1977, էջ 22 (ընդգծումն իմն է — Ն. Մ.):

⁷ Տե՛ս նույն տեղում, էջ 24, գիտելիք:

⁸ Տե՛ս Կ. Ղաֆազարյան. Հաղբատ. Երևան, 1963, էջ 168—169 (ընդգծումն իմն է — Ն. Մ.):

⁹ Տե՛ս Գ. Հովսեփյան. Խաղբակյանք կամ Պոռչյանք հայոց պատմության մեջ. Անթիլիաս, 1969, էջ 299:

քաջ Զաքարայ, որդին Սարգսի սպարապետին Վրաց արքային, աւաղական մահուամբ բարձաւ յաստեացս»¹⁰։ Հետեւաբար, ավանդույթը շարունակելով է, որ Իվանին իրեն «թագազն» է անվանում նույն Ալրիվանքի արձանագրութիւններէց մեկում¹¹։

Վերոհիշյալ փաստերի լույսով իմաստավորվում է նաև Ալեքհատի 1223 թ. արձանագրութիւնը, որտեղ «Գրիգոր սնուցեալ»-ը՝ «Նըջսի թագուհւոյն և Մամքանայ», հաղորդում է իր շինարարական գործունեութիւն մասին¹²։ Պարզվում է, որ «թագուհի», հետեւաբար՝ Բագրատունի է դիտվել նաև Նըջիս Զաքարյանը։ Բացառված չէ, որ Շահնշահ I-ի որդի Զաքարիայի Բագրատունի համարվելն է ակնաբկվում Բագնայրի ավետարանի 1232 թ. հիշատակարանում, որտեղ նա «թագածին» է կոչվում¹³։ Այսպիսով, Բագրատունիներից սերված լինելը Զաքարյանները ընդգծել են շուրջ կես դարի ընթացքում, «Բագրատունիական» ծագման տեսութիւնն արտացոլվել է սկզբնաղբյուրների երկու տարբեր խմբերում՝ վիճաբար արձանագրութիւններում և ձեռագրերի հիշատակարաններում։ Եվ, այնուամենայնիվ, այս ամենը դեռ բոլորը չէ։ Զաքարյանների՝ Բագրատունիների հաջորդը գիտվելու հավակնութիւնները գաղափարախոսական բազմակողմանի ու ծավալուն հիմնավորում են ունեցել։

Նախ՝ Զաքարյանները իրենց արձանագրութիւններում յուրացրել են Անիի Բագրատունիների տիտղոսաշարի մեջ մտնող բազմաթիվ կարևոր բաղադրիչներ, այդ թվում նաև «շահնշահ» ու «տիեզերական» պատվանունները։ Գիտական գրականութիւն մեջ Զաքարյանների տիտղոսները, իհարկե, մշտապես արձանագրվել են, սակայն այդ կատարվել է զուտ ժամանակակից չափանիշների տեսանկյունից։ Պատմաբաններն այս փաստերն օգտագործել են Զաքարյանների հզորութիւնն աստիճանը նշելու, հայոց թագավորութիւնը վերականգնելու նրանց հավակնութիւնների հիմնավորվածութիւնը ցուցադրելու առիթով։ Հետազոտողների մի մասն էլ ամենայն լրջությամբ առարկել է ու եզրակացրել, որ Զաքարյաններն ու նրանց մերձավորներն ակնհայտորեն չափազանցութիւն մեջ են ընկել՝ իրենց իշխանութիւնը բնութագրելիս։ Միջնադարյան վկայութիւնների ժամանակակից ընկալումը, սակայն, ոչ միայն արդարացված չէ, այլև պարզունակ և միակողմանի է։ Բագրատունի թագավորները, ապա և Զաքարյանները, ամենից քիչ մտածել են ժամանակակիցների (և նրանց հետ միասին ապագա հետազոտողներին) թյուրիմացութիւն մեջ գցելու մասին և հետապնդել են միանգամայն իրական ու երկբային նպատակներ։ Տիտղոսները նրանց պաշտոնական գաղափարախոսութիւն կարևորագույն տարրերից են եղել, հիմնավորելով, օրինականացնելով, սրբագործելով այդ տոհմերի իշխանութիւնը։

Անիի Բագրատունիների պատվանունների շարքում ամենահայտնին, անշուշտ, «շահնշահ» տիտղոսն էր, որը Աշոտ II-ի (914—928) ժամանակ-

¹⁰ Տե՛ս Հայերեն ձեռագրերի հիշատակարաններ. ԺԳ դար, կազմեց Ա. Մաթևոսյան. Երևան, 1984, էջ 105։

¹¹ Տե՛ս Գ. Հ ո վ ս ե փ յ ա ն. նշվ. աշխ., էջ 299։ Դատելով Իվանի արձանագրած գրավումների տարեգրութիւնից՝ վիճադրումը կատարվել է 1219 թ. կամ հետո։

¹² Տե՛ս Ս. Զ ա լ ա լ յ ա ն ց. Ճանապարհորդութիւն ի Մեծն Հայաստան. մասն Ա, Տփլիս, 1842, էջ 103։ Որ այստեղ հիշատակված Նըջիսը Զաքարյանն է, երևում է նույն Գրիգորի 1235 թ., Հառիճում թողած արձանագրութիւնից. «Ես»՝ Գրիգոր, սնուցած մեծի Սարգսի դստերն Նըջսին» (տե՛ս Ս. Ա վ ա գ յ ա ն. Վիճական արձանագրութիւնների բառարանութիւն. Երևան, 1978, էջ 83—84)։

¹³ Տե՛ս Հայերեն ձեռագրերի հիշատակարաններ. ԺԳ դար, էջ 178։ Հնարավոր է, որ Զաքարեն «թագածին» անվանվելու առ հիմք էլ է ունեցել։ Հարցն այն է, որ հիշատակարանում թագավորական է դիտվում արդեն Շահնշահի դիրքը։

ներից ի վեր կրում էին ընդ որում Բագրատունի զահակայինները¹⁴։ Ուստի Հաքարյաններին՝ Բագրատունիների իրավահաջորդը Հանաչվելու ձգտումն ականջալսողներն է արտահայտվել, առաջին հերթին, Շահնշահ» պատվանունը յուրացնելիս։ Այսպես, Հաքարե ամիրսպասալարը «շահնշահ» է անվանվում դեռևս 1191—1196 թթ., մինչև 1199 թ. Բագրատունյաց մայրաքաղաք Անիին տեղափոխվելուց¹⁵։ Այդ տիտղոսին Հաքարեն այնքան մեծ կարևորություն է տվել, որ որդու համար նախընտրել է Շահնշահ կրկնանունը։ Ընդ որում՝ վերջինս այնքան գործածական դարձավ, որ գրեթե մոռացության մատնվեց մասկան «Սարգիս» բուն անունը¹⁶։ Հաքարե ամիրսպասալարի կատարած քաղաքականությունն ավելի կընդգծվի, եթե նկատի առնենք, որ «շահնշահ» տիտղոսը, թերևս XII դարի առաջին քառորդից, Դավիթ IV Շահնշահ (1089—1125) ժամանակներից սկսած, Վրաստանի տիրակալների պաշտոնական տիտղոսաշարի մեջ էր մտնում¹⁷, և, բնականաբար, պետք է մենաշնորհային բնույթ կրեր։

«Շահնշահ» տիտղոսից հետո Հաքարյանները տիրացել էին նաև «տիեզերակա» պատվանվանը, որը ևս Անիի Բագրատունիների տիտղոսաշարի առանցքային բաղադրատարրերից էր։ Հայ պատմագիտության մեջ թեև ավանդաբար «տիեզերակալ» է ճանաչվում Սմբատ II-ը (977—990)¹⁸, առկա բոլոր տվյալները, այնուամենայնիվ, աներկբայիորեն վկայում են, որ Բագրատունի զահակայիններից առաջինը Սմբատ I-ն (890—914) է կրել «տիեզերակալ» տիտղոսը¹⁹։ Այն փաստը, որ Սմբատ I-ը «տիեզերակալ» է կոչվում «Քարթլիս ցխովրեբայի» կազմի մեջ մտնող «Քարթլիի մատյանում»²⁰, ապացուցում է, որ Բագրատունիների նաև այս տիտղոսն էր միջազգային ճանաչման արժանացել²¹, Այն առկա էր Բագրատունիների տիտ-

14 Տե՛ս Ա. Տեր-Ղևոնդյան. Հաղթափ արաբերեն արձանագրությունը և Բագրատունի թագավորների տիտղոսները.— «Երաբեր հասարակական գիտությունների», 1979, № 1, էջ 73—78։

15 Տե՛ս Ա. Շահնշահյան. Կոչի կոթողը և նրա արձանագրությունը.— «Պատմա-բանասիրական հանդես», 1968, № 2, էջ 198—201, Պ. Մուրադյան. Հայաստանի վրացերեն արձանագրությունները. Երևան, 1977, էջ 105—106։

16 Տե՛ս Հ. Աճառյան. Հայոց անձնանունների բառարան. հ. Դ, Երևան, 1943, էջ 110։

17 Տե՛ս Վրաստանի պատմության ակնարկներ. հ. 3, Թբիլիսի, 1979, էջ 256 (վրացերեն)։

18 Տե՛ս Հ. Աճառյան. նշվ. աշխ., էջ 548։ Հայ ժողովրդի պատմություն. հ. III, Երևան, 1976, էջ 134։

19 Տե՛ս Ա. Տեր-Ղևոնդյան. նշվ. աշխ., էջ 75։ Հայ ժողովրդի պատմություն, հ. III, էջ 269 (բաժնի հեղինակը Ա. Տեր-Ղևոնդյանն է)։ Բացի Ա. Հովհաննիսյանի վկայակոչած Սանահնի Քոթուկից (տե՛ս Կ. Ղաֆազարյան. Սանահնի վանքը և նրա արձանագրությունները, էջ 190) և Ա. Տեր-Ղևոնդյանի մատնացուցած մի հիշատակարանից (տե՛ս Գ. Հովսեփյան. Հիշատակարանք ձևագրաց. հ. Ա, Անթիլիաս, 1951, էջ 172), Սմբատ I-ին հայ մատենագրության մեջ «տիեզերակալ» են անվանում նաև պատմիչներ Սամվել Անեցին (տե՛ս Սամուել Անեցի. Հաղթանակի զորոց պատմագրաց. Վաղարշապատ, 1893, էջ 102—103) և Մխիթար Այրիվանեցին (տե՛ս Մխիթար Այրիվանեցի. Պատմութիւն Հայոց-Մոսկվա, 1860, էջ 56)։

20 Տե՛ս Քարթլիս ցխովրեբայ. հ. 1, Թբիլիսի, 1955, էջ 262 (վրացերեն)։

21 Ա. Արզալանյան «տիեզերակալ» տիտղոսի վրաց մատենագրության մեջ գործածվելու հնարավոր հիմք է համարում հայ գրավոր կամ բանավոր աղբյուրները (տե՛ս Ա. Արզալանյան. Քարթլիս ցխովրեբայի և Հայաստան—Վրաստան փոխհարաբերությունները. Թբիլիսի, 1982, էջ 208—209)։ Սակայն վրաց պատմիչի հաղորդած դրվագը առհասարակ հայտնի չէ հայկական աղբյուրներին։ Քանի որ վրացի պատմիչը դույզն իսկ կասկածի չի ենթարկում «տիեզերակալ» տիտղոսի իրավադրությունը, թեև նրան քաջ հայտնի է Սմբատ I-ի ողբերգական վախճանը ու դժվար թե հեղինակի համար անհասկանալի է եղել հայերեն բառի

զոսաշարում նաև Գագիկ I-ի²² (990—1020) և Հովհաննես-Սմբատի²³ (1020—1041) օրոք²⁴։ Բագրատունիներ-Ջաքարյաններ հերթագայությունը շեշտելու ձգտման ազդեցիկությունը ցույց տալու համար զուգահեռ մեջբերենք երկու վիմագիր արձանագրություն, առաջինը թողնված ժամանակի հայոց կաթողիկոս Պետրոս Գետադարձի, երկրորդը՝ նշանաձոր «մեծատուն» Տիգրան Հոնենցի կողմից։

Ի նՁե թուականիս Հայոց եւ ի մեծափառ թագաւորութեանս հզաւ եւ տիեզերակալ Սմբատա, որդւո Գագիկա Հայոց եւ Վրաց շահայնշահի, կամ եղեւ ինձ, տեառն Պետրոսի Հայոց կաթողիկոսի։²⁵

Թվին Ոկո, շնորհուն եւ ողորմութեամբ Այ. յորժամ տիրեց քաղաքիս Անո հզաւ եւ տիեզերակալ ամիր-սպասալար եւ մանդատութեանս ցէս Ջաքարիայ եւ որդի նորայ Ծահընշահ, եւ Տիգրան ծառայ Այ...²⁶

Այսպիսով, շուրջ երկու հարյուրամյակ անց, Անիի հերթական տիրակալն ընդունել է, «շահնշահից» բացի, նաև «տիեզերակալ» տիտղոսը։ Հետագոտությունը ցույց է տալիս, որ «տիեզերակալ»-ը կիրառման ուշադրավ առանձնահատկություն է ունեցել։ Մեջբերված արձանագրություններում այն հանդես է գալիս «հզաւ» մակդիրի լծորդումով, և այդ երկուսն այնքան հաճախ են միասին գործածվել, որ հասարակացվել են ու իշխանությունն բնութագրման երանգ ձեռք բերել։ Այդ միտումն ակնհայտ է Գագիկ I-ի հրովարտակ-արձանագրությունում, որի բանաձևային մասում՝ «կամ եղեւ ինձ» Գագիկա, հզաւ եւ տիեզերակալ շահինշահի²⁷, կայուն զուգորդություն կազմող «հզաւ եւ տիեզերակալ» տիտղոսները բացահայտորեն երկրորդական կարևորություն ունեն։

Բագրատունիների և Ջաքարյանների տիտղոսաշարերի միջև դիտվում է ևս մեկ բնորոշման ընդհանրություն։ Վերևում մեջբերված Անիի նՁե (1036) թվականի արձանագրությունում Պետրոս Գետադարձ կաթողիկոսը Հովհան-

իմաստը, ապա մնում է կատարել միայն մեկ եզրահանգում՝ վրացի մատենագիրը արձանագրել է միջակտական հարաբերությունների քննադատական պատկանող փաստ, որի համար հայկական սկզբնաղբուր ունենալը ամենևին պարտադիր չի եղել։

22 Տե՛ս Ս. Ս ա ղ ու մ յ ա ն. Գագիկ Ա թագավորի նորահայտ արձանագրությունը.—«Լրաբեր հասարակական գիտությունների», 1989, № 9, էջ 91—92։

23 Տե՛ս Դիվան հայ վիմագրության. I, Երևան, 1966, էջ 48։

24 Պանդալեոն քահանայի 965 թ. հիշատակարանից (տե՛ս Հայերեն ձևագրերի հիշատակարաններ. Ե—ԺԲ դդ., աշխատասիրված Ս. Մաթևոսյանի. Երևան, 1988, էջ 57—58) երևում է, որ որոշ ժամանակ «տիեզերակալ», ինչպես նաև «արքայից արքա» տիտղոսները կրել են նաև Վասպուրականի Արծրունյաց Թագավորության դահակտները։ Դրանցից երկրորդը համապատասխանում էր բյուզանդական «արքունիների արքուն» պատվանդանը, որը շնորհվել էր առաջին երեք Բագրատունի թագավորներին, իսկ Աշոտ II-ի մահից հետո 929 թ. տրվել էր Գագիկ I Արծրունուն (929—943), Վասպուրականի դահակտների մեծնաշնորհը կազմելով մինչև X դարի 70-ական թթ. կեսերը (տե՛ս Կ. Ց ու լ դ ա շ յ ա ն. «Բագրատունյաց շրջանի» Հայաստանը՝ միջադարձի իրավունքի տեսանկյունից.—«Պատմա-բանասիրական հանդես», 1975, № 1, էջ 45—47)։ Հավանաբար, հենց այս ժամանակատվածում էլ Արծրունիներին էր անցել նաև «տիեզերակալ» տիտղոսը։ Տե՛ս Ա. Հ ո վ հ ա ն ն ի ս յ ա ն. նշվ. աշխ., էջ 132։ Վ. Վ ա ղ ա ն յ ա ն. Վասպուրականի Արծրունյաց թագավորությունը. Երևան, 1969, էջ 176—177։ В. А. Арутюнова—Фиданьян. Памятная записка священника Пандалеона.—Византийский современник, т. 51, М., 1990, с. 112—118.

25 Դիվան հայ վիմագրության, I, էջ 48։

26 Նույն տեղում, էջ 63։

27 Տե՛ս Ս. Ս ա ղ ու մ յ ա ն. նշվ. աշխ., էջ 91—92։

նես-Սմբատի «Թագաւորութիւն»-ը բնութագրում է «մեծափառ» մակդիրով: Պ. Մուրադյանի դիպուկ կուսմամբ, այդ հայերեն տիտղոսն է, որ արտացոլված է Թեոֆոնի վրացերեն արձանագրութիւնում «բարք-գիդի» (բարք = փառք + մեծ) ձևով, որպէս Զաքարե ամիրսպասալարի իշխանութիւն բնորոշում²⁸:

Ինչպէս և պետք էր սպասել, Զաքարյանները «շահնշահ» և «տիեզերակալ» պատվանունները կրել են այնքան ժամանակ, քանի դեռ նրանց իրական հզորութիւնն ու ազդեցութիւնը ինչ-որ չափով համապատասխանում էին նրանց տիտղոսաշարին: Նրանցից վերջինն Ավագն էր, որ մինչև XIII դարի 40-ական թթ. վերջերը «տիեզերակալ» էր համարվում²⁹:

Զաքարյանները իրենց իրավահաջորդութիւնն ընդգծել են նաև այնպիսի տպավորիչ ձեռնարկումով, ինչպիսին Սանահինում Կյուրիկյանների տոհմական գերեզմանոցը սեփական ընտանեկան հանգստարան դարձնելն է եղել³⁰: Բագրատունիներ-Զաքարյաններ ժառանգականութիւնը շեշտվել է վանքում կատարված այն վերականգնումներով, որ իրականացրել են Զաքարյանները³¹:

Ամփոփելով Զաքարյանների՝ Բագրատունիներից սերելու վարկածը հիմնավորող ուղղակի և անուղղակի տվյալների քննութիւնը, անհրաժեշտ է ընդգծել, որ «Բագրատունիական» ծագման տեսութիւնը, անշուշտ, ամենաքաղաքականացվածն է: Այն կյանքի է կոչվել XII դարի վերջում, երբ Զաքարյանները իրապես տիրում էին Բագրատունիների արքայատոհմի տարբեր ճյուղերի ժառանգութիւն զգալի մասին և շուտով ավելի էին ընդարձակելու իրենց պատկանող տարածքները: Զաքարյանների տիտղոսաշարի քրննութիւնից ակներև է, որ այդ ժամանակահատվածում նրանք հավանում էին դառնալու ոչ թե Կյուրիկյանների, այլ Շիրակի Բագրատունիների քաղաքական ժառանգորդը: Հետևաբար, իրենց Բագրատունի հուսկելիս նրանք առաջին հերթին ելնում էին նաև Անիի շահնշահների իրավահաջորդ դարձած լինելու ծանրակշիռ փաստարկից:

Մեր ամբողջ շարադրանքի լուսի ներքո պարզ է դառնում, որ Բագրատունիների ու Զաքարյանների իրական ազգակցութիւն մասին պնդելը կնշանակեր վերացարկվել միջնադարյան իրողութիւններից ու բառացի ընկալել սկզբնաղբյուրների մի մասի հավաստիացումները: Բնութագրական փաստ է, որ ուսումնասիրողներից առայժմ միայն Կ. Տեր-Մկրտչյանն է փորձել հիմնավորել Զաքարյանների՝ Բագրատունիներից սերելու վարկածը³², բայց այդ տեսակետը ընդունելութիւն չի գտել գիտական գրականութիւն մեջ:

²⁸ Պ. Մուրադյան, նշվ. աշխ., էջ 117—119:

²⁹ Տե՛ս Գ. Սարգսյան. «Բարձրաքաջ» վանքը և նրա վիմագրութիւնը. — «Էջմիածին», 1951, ԺԱ.—ԺԲ, էջ 50; Հ. Եղիազարյան. Դռնդի Բարձրաքաջ Ս. Գրիգորի և Քառասնից մանկանց վանքերը և գյուղի մյուս՝ առավել կարևոր հուշարձաններն ու գրանց վիմագիր արձանագրութիւնները. — «Էջմիածին», 1971, Գ, էջ 45:

³⁰ Իրենք՝ Կյուրիկյանները, սկսած XI դարի վերջից, թաղվում էին Հաղրատում (տե՛ս Ղ. Մովսէսյան. Լոռիի Կյուրիկյան թաղավորներու պատմութիւնը. Վիեննա, 1923, էջ 55; Ռ. Մաթևոսյան. Տաշիր-Ձորագետ. Երևան, 1982, էջ 100): Զաքարյաններից Սանահինում են հուղարկավորվել Սարգիս Մեծը և Զաքարե II-ը, իսկ հետո Զաքարյանների տարբեր տոհմաճյուղերը այլևայլ վանքերում են գերեզմանատներ հիմնել:

³¹ Տե՛ս H. Khalpakchian. Le tombeau des Zakarides à Sanahin. — Etudes Arméniennes in memoriam H. Berberian, Lisbon, 1986, p. 357—374.

³² Տե՛ս Կ. Տեր-Մկրտչյան, նշվ. աշխ., էջ 18—31:

1196 թ., երբ ազատագրվեց Ամբերդը, ի պատիվ այդ հաղթանակի հուշարձաններ կանգնեցվեցին ինչպես հայերեն³³, այնպես էլ արաբերեն լեզուներով³⁴։ Ամբերդի արաբերեն միմագրում, Ջաքարե ամիրսպասալարի և Իվանեի անուններից հետո, ընթերցվում է «Աս-սարունի» բառը, որին տոհմական ղեկավար է հասկացվում։ Այսպիսով վկայված է Ջաքարյանների ծագման երբորդ վարկածը, այն էլ հենց տոհմի անվանի ներկայացուցիչների կողմից։ Նրանց Արծրունի անվանելը Ա. Տեր-Ղևոնդյանը բացատրում է նշանավոր տոհմերի հետ կապվելու ցանկությունով։ Ըստ հետազոտողի, այս հարցում վճռական դեր է կատարել այն հանգամանքը, որ Սարգիս Մեծն ամուսնացած էր Ամիր-Քուրդ Արծրունու քրոջ՝ Սահակդուխտի հետ։ Այնուհետև, եթե Ջաքարյանները Բագրատունի են կոչվել Կյուրիկյանների հետ ունեցած խնամությունից հիման վրա, ապա Ջաքարեն ու Իվանեն էլ կարող էին Արծրունի անվանվել՝ այս անգամ կապվելով Արծրունիների տոհմի հետ³⁵։ Այս լիովին տրամաբանական բացատրությունը հավանական կդիտվեր, եթե հիշվի։ Ջաքարյանները Բագրատունի դիտված լինեին սոսկ Կյուրիկյանների հետ խնամությունից հիմքի վրա, ինչպես նաև Մահկանաբերդցիների ու Արծրունիների տոհմակցության աներկբայելիության պարագայում։ Սակայն հարցն այն է, որ Մահկանաբերդի գավառի տերերը XII դարի երկրորդ կեսում իրենց դեռևս Արծրունիների տոհմի հետ չէին առնչում։ Այդ վարկածի տարածվելու նշանները ի հայտ են գալիս միայն XIII դարի երկրորդ կեսում, Մազուն II աթաբեկի գործունեության հետևանքով³⁶։ Հետևաբար, Ջաքարյանները չէին կարող Արծրունի անվանվել՝ շահարկելով Մահկանաբերդցիների հետ խնամական կապը։

Ամբերդի արաբերեն արձանագրությունում հավաստված փաստն ավելի շուտ հնարավոր է մեկնաբանել XII դարի վերջի—XIII դարի սկզբի քաղաքական իրադարձությունների հտնախորքի վրա։ Ջաքարյանների՝ Արծրունի կոչվելու հավանությունները, ըստ երևույթին, Ջաքարեի և Իվանեի քաղաքական ծրագրերի յուրօրինակ արտացոլումն են։ XII դարի վերջին տարիները և հաջորդ հարյուրամյակի սկիզբն այն ժամանակահատվածն են կազմում՝ Հարավային Հայաստանի մեծ մասը զբաղեցնող Շահ-Արմենիների պետության մեջ, երբ այդ ամիրայությունը տենդագին պայքար էր մղում հանուն գոյատևման։ Իրավիճակից ձգտում էին օգտվել Ջաքարյանները, որոնք մեկ անգամ չէ, որ արշավանքներ ձեռնարկեցին դեպի Մանազկերտ, Արճեշ և Խլաթ։ Ջաքարյանների հարավային քաղաքականությունն անհաղթահարելի խոչընդոտների հանդիպեց միայն 1207 թ. հետո, երբ Խլաթում հաստատվեցին Այուբյանները³⁷։ Կարելի է ենթադրել, որ Արծրունի հուշակվելը Ջաքարյանների ծրագրերի հաջողությունը ապահովելուն նպատակաուղղված միջոցառումներից մեկն է եղել։ Արծրունի կոչվելով, նրանք կարող էին վասալության և հարակից տարածքների օրինական տիրակալի կեցվածք ընդունել և համապատասխան ռազմական գործողություններ ձեռնարկել, ակնկալելով հիմնականում հայերով բնակեցված ամիրայության

³³ Տե՛ս Ա. Շահինյան, նշվ. աշխ., էջ 198—201։

³⁴ Տե՛ս Ա. Տեր-Ղևոնդյան, Ջաքարիայի և Իվանեի արաբատառ արձանագրությունը Ամբերդում.—«Պատմա-բանասիրական հանդես», 1971, № 1, էջ 185—187։ А. А. Хачатрян. Корпус арабских надписей Армении, Вып. I, Ереван, 1987, с. 47.

³⁵ Ա. Տեր-Ղևոնդյան, Ջաքարիայի և Իվանեի..., էջ 186—187։

³⁶ Տե՛ս Գրիգոր վարդապետ, Պատմութիւն Թաթարաց, Երուսաղեմ, 1974, էջ 42, 48։ Մխիթար Այրիվանեցի, էջ 88։

³⁷ Տե՛ս 2. Մարգարյան, Քաղաքական կացությունը Մերձավոր Արևելքում և Հայաստանի ազատագրման հեռանկարները (XII—XIII դդ.)։—«Պատմա-բանասիրական հանդես», 1989, № 1, էջ 36—43։

քնակչության աջակցությունը: Ինչպես հայտնի է, խլաթում 1210/1211 թթ. կրած անհաջողությունից հետո Զաքարյանների առաջխաղացումը դեպի հարավ կանգ առավ, հետևաբար և Արծրունիների ժառանգորդը դառնալու ձրգտումը երկար պահպանվել չէր կարող: Ինչպես ցույց տրվեց վերևում, Զաքարյանները ամենից ավելի հաճախ են ուղղակի Բագրատունի կոչվում XIII դարի երկրորդ տասնամյակում: Հակված ենք կարծելու, որ այդ հանգամանքը նաև Զաքարյանների ծագման Մարծրունիական տեսությունը ընդմիշտ մոռացության մատնելու հետևանք է:

Զաքարյանների տոհմականքների հարցին անդրադառնում է նաև նրանց գործունեությանը քաջածանոթ հեղինակը՝ Թամար Թագուհու առաջին պատմիչը: Զաքարն ամիրսպասալարին բնութագրելու առիթով մատենագիրը նշում է, թե նա Արտաքսերքսես Երկայնաբազուկի տոհմակիցն էր և այդ հանդամանքով է բացատրում ականավոր զորավարի բարեմասնությունները³⁸: Այս տեղեկության ոչ պատմական լինելն ակնհայտ է և Աքեմենյանների-Զաքարյանների ազգակցությունը փաստարկելու փորձերը կանխապես անհաջողության են դատապարտված: Այնուամենայնիվ, վրացի պատմիչի հաղորդումը զուրկ չէ կարևորությունից՝ ինչպես պատմադրական ավանդույթի ազդեցության, այնպես էլ որոշակի քաղաքական մտածողության արձագանք լինելու տեսանկյունից: Հայտնի է, որ վրացի հեղինակը քաջածանոթ է անտիկ աշխարհի իրողություններին և դասական հնագրի նշանավոր դեմքերին: Աքեմենյան նշանավոր արքաներից մեկի հիշատակությունը, ընդ որում անվան հունական ձևով, այդ տեղյակության վկայություններից է³⁹: Զաքարյաններին Աքեմենյան ծագում վերագրելը նաև ցույց է տալիս այն տեղը, որը Վրացական Թագավորության տոհմերի յուրօրինակ աստիճանականության մեջ Զաքարյաններին է հատկացնում պատմիչը: Վրաց Բագրատունիներին նա սերված է համարում աստվածաշնչական նշանավոր Դավիթ արքայից (Դավիթիանի), իսկ Թամար Թագուհու ամուսին Դավիթ Սոսլանին՝ սուրբդրական այդ Թագավորի եղբորորդի Եփրեմից (Եփրեմիանի): Վրացի պատմիչը այդպիսով ցանկացել է ընդգծել վրաց Բագրատունիների առավելությունը օսական Թագավորական տոհմի նկատմամբ: Քանի որ աստվածաշնչական ավանդույթը Դավիթի սերունդներին ակնհայտորեն բարձր է դասում Եփրեմի շառավիղներից, ապա պարզ է, որ «Դավիթիանի» և «Եփրեմիանի» անվանումները քաղաքական-գաղափարախոսական որոշակի տեսությունների արտացոլում են⁴⁰: Վրացի հեղինակի հայեցակերպի համաձայն, Զաքարյանները նույնպես Թագավորական ծագում են ունեցել, բայց ազնվատոհմությամբ, այնուամենայնիվ, զիջել են Թագավորական զույգին: Միաժամանակ՝ վրացի պատմիչը հետևել է «հին» և «օտար» ծագման գերա-

38 Տե՛ս Քարթլիս ցխովրեբա. հ. 2, Թրիլիսի, 1959, էջ 110 (վրացերեն):

39 Հայկական սկզբնաղբյուրները Արաքսերքսես Աքեմենյանին (մ. թ. ա. 465—424) Արտաշես Երկայնաբազուկ են անվանում (տե՛ս Ստեփանոս Տարօնեցի Ասողիկ. Պատմութիւն տիեզերական. Ս. Պետերբուրգ, 1885, էջ 23: Մխիթար Այրիվանեցի, էջ 40: Վարդան Արևելցի. Պատմութիւն տիեզերական. Մոսկվա, 1861, էջ 41), այդպես հայացնելով նրա մականունը: Այդ պատճառով էլ հայ պատմագրության մեջ, որպես վրացերենի «Մխարթեբելի»-ի (բառացի նշանակում է «երկարատև») հայացված Թագամունություն, տարածում է ստացել Զաքարյանների «Երկայնաբազուկ» անվանումը:

40 Տե՛ս Կ. Կեղևիլիձե. Վրացական քաղաքական մտածողության մի պարագա դասական ժամանակաշրջանի գրականության մեջ.—էտյուդներ հին վրաց գրականության պատմությունից, հ. 1, Թրիլիսի, 1956, էջ 312—318 (վրացերեն):

դասութեան հայացքին⁴¹, որին, ինչպես ցույց է տրվել մեր նախորդ հոդվածում, Զաքարյանների տոհմականքը լուսաբանելիս տուրք են տվել նաև հայ հեղինակները:

* * *

Զաքարյանների ծագման խնդրի դոհացուցիչ լուսաբանումն անհնար է պատկերացնել առանց վերլուծելու XI—XII դարերի այն իրողությունները, որոնք անմիջականորեն են առնչվում տոհմի վազ շրջանի պատմությանը: Գիտական գրականության քննությունից, սակայն, այն տպավորություն է ստեղծվում, թե հետազոտողները բավարարվել են նախորդ էջերում ներկայացված վարկածների վերաշարադրումով, հաճախ անուշադրության մատնելով մնացած սկզբնաղբյուրների, իրենց նախընտրած տեսությունը հակասող, տեղեկությունները: Զարմանք է հարուցում այն հանգամանքը, որ պատմաբաններին բնավ չեն զբաղեցրել Զաքարյանների գաղթի հավանականություն, Կյուրիկյան Հայաստանում նրանց ռազմական ու քաղաքական առաջընթացի իրական հեռանկարի, քրիստոնեություն ընդունելու նպատակահարմարության հարցերը: Մի խոսքով՝ իրադարձությունների հավաստիության ստուգումը, որպես կանոն, դուրս է մնացել հետազոտողների տեսադաշտից: Փոխարենը նրանք առատորեն տարբեր են փոխառել Զաքարյանների ծագման իրենց գերադասած վարկածը լիովին բացառող մյուս տեսություններից: Մասնավորապես, Զաքարյանների ծագման «Բագրատունիական» և «Արծրունիական» տեսությունների պաշտպանները ընդունել են իշխանատոհմի ճորդական» սերման հայեցակետի առանցքային գաղափարները՝ գաղթի, հարավից հյուսիս տեղաշարժի, Կյուրիկյանների թագավորությունում հաստատվելուց հետո հայադավանության ընդունման վերաբերյալ: Այդ է պատճառը, որ Զաքարյանների վաղնջական պատմությունը ներկայացնելիս գիտնականները հաճախ զուգակցել են իրականն ու մտացածինը, թույլ տվել ակնհայտ վրիպումներ:

Ցույց տանք մեր դատողությունների արդարացիությունը միայն մեկ, բայց առանցքային խնդրի՝ Զաքարյանների նախնիների տեղաշարժի ժամանակի հարցի օրինակով: Կառչած մնալով տոհմի գաղթական լինելու տեսակետին՝ ուսումնասիրողների մեծ մասը անխուսափելիորեն բախվել է այդ առեղծվածի լուծման դժվարությունների հետ: Ընդ որում՝ նրանց առջև ծառացած խնդրի լուծումը սկզբունքորեն անհաղթահարելի չի եղել: Հիրավի. եթե Զաքարյանների նախնիները Տաշիր-Ձորագետ են տեղափոխվել Սարգիս IX Մեծից երկու (ըստ Կիրակոս Գանձակեցու)⁴² կամ երեք (վարդան Արեւիցու վկայությունների համաձայն)⁴³ սերունդ առաջ, ապա, նախապես պարզելով Զաքարյանների մեկ սերնդի կյանքի միջին տևողությունը, կարելի է բավական ճշգրիտ հաշվարկներ կատարել: Բայց, որքան էլ տարօրինակ է, ուսումնասիրողները չեն ընթացել այդ միակ տրամաբանական ուղիով: Հաշվումները կատարվել են «աչքաշափով» և Զաքարյանների գաղթը ենթադրվել է այս կամ այն Կյուրիկյան թագավորի կառավարման ժամանակաշրջանում: Այս առումով հատկապես պերճախոս է Աս. Շահնազարյանցի հետևյալ դատողությունը. «Խոսքով, Ավագ Սարգիս, Զաքար 1 և Սարգիս Մեծ. յուրաքանչյուրին վերագրելով մինչև իսկ 40—45 տարվա կյանք, եթե ոչ ավելի, կգանք այն եզրակացության, որ Զաքարյանները կարող են գաղթած լինել 11-րդ

⁴¹ Վրաց միջավայրում այգորինակ գաղափարների ազդեցիկության մասին տե՛ս Շ. Մեսխիա. նշվ. աշխ., էջ 209—210: Կ. Կեկելիձե. Ընձնավորի հեղինակը և նրա գրության ժամանակը.— էություններ հին վրաց գրականության պատմությունից, հ. 12, Թբիլիսի, 1973, էջ 54 (վրացերեն):

⁴² Տե՛ս Կիրակոս Գանձակեցի. Պատմութիւն Հայոց. Երևան, 1961, էջ 162:

⁴³ Տե՛ս Վարդան Արեւիցի, էջ 181:

դարու առաջին կեսին⁴⁴։ Ուսումնասիրողներից ոմանք նույնիսկ ավելի հեռու են դնացել և Ջաքարյանների նախնիների որոշակի թվով սերունդների գործունեությունը հաշվել են ըստ Վրաստանի արքաների կառավարման ժամանակաշրջանների⁴⁵, երբ որ վերջիններս այդ պատմափուլում որևէ առնչություն չեն ունեցել Ջաքարյանների հետ։

Այսպիսով, անկախ այն հանգամանքից, թե որքանով ենք հավաստի համարում Ջաքարյանների գաղթի տեսությունը, հարկադրված ենք պարզել կոնկրետ Ջաքարյանների տոհմի հետ կապված երկու էական ժամանակագրական խնդիր։ Որքան է եղել կյանքի միջին տևողությունը Ջաքարյանների տոհմում, քանի՞ տարի է ակտիվ ռաջաքաղաքական գործունեություն ծավալել յուրաքանչյուր սերունդ։

Առաջին հարցին պատասխան տալու համար բերենք առաջին Ջաքարյաններից Սարգիս II Մեծի, Ջաքարե II-ի և Իվանե I-ի ու երկու հիմնական տոհմաճյուղերի՝ Շահնշահյան և Ավագյան տների մասին մեր ունեցած տրվյալները, ներկայացնելով դրանք աղյուսակի տեսքով⁴⁶։

Անուն	Ծննդյան ժամանակ	Մահվան ժամանակ	Կյանքի միջին տևողություն	Սերունդ
Սարգիս II	1120—30-ական թթ.	1187	57—67	1
Ջաքարե II	1130-ական թթ. 2-րդ կես	1212	57—62	2
Իվանե I	Նույնը—60-ական թթ. 1-ին կես	1237/34	78/79—82/89	2
Շահնշահ I	1187	1261/62	64—65	3
Ավագ	1180—90-ական թթ.	1250	60—70	3
Իվանե II	1220—30-ական թթ.	1284—91	54/61—64/71	4
Շահնշահ II	1260-ական թթ.	1320	60/65	5

Այսպիսով, մեր հաշվումները վերաբերում են 5 սերնդի, ընդ որում նկատի ենք առնում միայն անդրանիկ որդիներին առնչվող տվյալները։ Թիակ բացառությունը անում ենք վաղամեռիկ Ջաքարե III-ի համար, որի փոխարեն բերում ենք եղբոր՝ Իվանե II-ի մասին եղած ցուցումները։

Աղյուսակի համար ելակետային և վերջակետային սահմաններ են ծառայել I-ին և 5-րդ սերունդները։ Ընտրությունը պատահական չի եղել։ Ամենասկզբում տեղագրել ենք երկու տոհմաճյուղերի իսկական հիմնադիրներին՝ Ջաքարե II-ի և Իվանե I-ի հոր՝ Սարգիս II Մեծի մասին տեղեկությունները։ Ամենավերջում Շահնշահ II-ի տվյալներն են, քանի որ երկու եղբայրների ծոռները՝ Շահնշահ II-ը և Խուանդզեն XIII դարի վերջում ամուսնացել էին միմյանց հետ, և այդպիսով յուրօրինակ շրջանակը կրկին փակվել էր, Ջաքարյանների գլխավոր տոհմաճյուղերը այդ զույգի մեջ վերստին միավորվել էին։ Միջանկյալ 2-րդ և 3-րդ սերունդները առկա են երկուական անդամներով, ավելի ներկայացուցչական դարձնելով համահավաք աղյուսակը։ 4-րդ սերնդից վերջրել ենք միայն Իվանե II-ի տվյալները, քանի որ Ավագյանների տոհմաճյուղի միակ անդամ Խոշաքը, թույլ սեռը ներկայացնելով, տիպական օրինակ չի կարող ծառայել նմանօրինակ հաշվարկների համար։ Ար-

⁴⁴ Ա. Ա. Շահնազարյանց. նշվ. աշխ., էջ 73 (ընդգծումն իմն է—Ն. Մ.)։

⁴⁵ S. H. M. Brosset. Op. cit., p. 267; Դ. Մ. Ե. Ե. Ե. Ե. նշվ. աշխ., էջ 229.

⁴⁶ Ժամանակագրական ցուցումները վերցնում ենք Ջաքարյանների տոհմի բոլոր անդամների մասին մեր կազմած հարցաթերթիկներից (տե՛ս Ն. Մ. Ե. Ե. Ե. Տիրապետող դասակարգը Հայաստանում XII—XIII դարերում.—«Պատմա-բանասիրական հանդես», 1990, № 4, էջ 44—45)։

դրույնքում ստացվել է, որ Զաքարյանների տոհմում կյանքի միջին տևողությունը եղել է 61/62-ից 68/69 տարի, որը առանձին անակնկալ համարվել չի կարող:

Սակայն ավելի հուսալի ժամանակագրական կուլաններ կարող ենք ստանալ, եթե հաշվարկենք Զաքարյանների ռազմաքաղաքական ակտիվության միջին տարեքանակը: Հարցն այն է, որ միջնադարյան գործիչների ծննդյան ժամանակը շատ ավելի վատ է հայտնի, քան նրանց մահվան տարեթիվը: Զաքարյանների դեպքում, օրինակ, ամբողջ աղյուսակից կոնկրետ տեղյակ ենք միայն մեկի լույս աշխարհ գալու տարեթվին, երբ որ հակառակ տվյալները միանգամայն այլ պատկեր են ներկայացնում. ճշգրիտ չէ լուկ մեկի մահվան թվականը: Բացի այդ, չմոռանանք, որ Զաքարյանները, գրեթե առանց բացառության, ռազմական գործիչներ են եղել, որոնց անվան հետ կապված տվյալները համեմատաբար լավ են արտացոլված սկզբնաղբյուրներում: Բացի այդ, նրանց զինվորական կյանքի սկիզբը և ավարտը սահմանափակված են եղել որոշակի կենսաբանական հնարավորություններով: Հարկ եղած պահին ծերացած գործավարը հարկադրված պետք է թողնեի ասպարեզը: Հիշելով, այդ էլ տեղի է ունեցել Իվանե I-ի հետ, որը 1225 թ. հետո որդուն էր զիջել պետական ու զինվորական գործերի վարումը: Միևնույն սկզբունքներով կազմված աղյուսակը բացահայտում է հետևյալ պատկերը:

Անուն	Ինքնուրույն գործունեության սկիզբը	Գործունեության ավարտը	Դործունեության միջին տևողությունը	Մեքունք
Սարգիս II	1161-ից ոչ ուշ	1187	26	1
Զաքարե II	1184/5	1212	27/28	2
Իվանե I	1190/91	1225	34/35	2
Շահնշահ I	1220-ից ոչ ուշ	1261/2	41/42	3
Ավագ	1235	1250	25	3
Իվանե II	1259-ից ոչ ուշ	1284—91	25/32	4
Շահնշահ II	1291-ից ոչ ուշ	1320	29	5

Պարզվում է, որ յուրաքանչյուր սերունդ ինքնուրույնաբար ակտիվորեն մասնակցել է ծավալված իրադարձություններին միջին հաշվով 29/30 տարվա ընթացքում: Հաշվի առնելով, որ Զաքարյանների մի մասին վերաբերող տվյալները նրանց գործունեության իրական սկզբի անցքերը չեն, որ արտացոլում են (չորս դեպք), ապա որպես միջին թիվ կարելի է վերցնել 30-ը: Մեր մոտավոր, բայց և ավելի մեծ վստահություն ներշնչող տվյալները հուշում են, որ Զաքարյանների ամեն մի սերունդ ակտիվ ինքնուրույն գործունեություն է ծավալել 31/32—38/39 տարեկան հասակից սկսած: Եթե պատկերացնենք տոհմի տեղափոխության հետ կապված հարցի ողջ պատասխանատվությունը, ապա թվում է, այդ տարիքն է այն սահմանը, որից ստորև գտնվող տղամարդը կոծվարանար ստանձնել նման քայլի հետևանքների բեռը:

Արդ կատարենք հաջորդ քայլը և պարզենք, թե Սարգիս Մեծին նախորդող երեք սերունդներից յուրաքանչյուրը ինչպիսի՞ ժամանակագրական շրջաններում է ծավալել իր գործունեությունը: Կստացվեն հետևյալ ժամանակագրական նշանաձեռները:

1-ին սերունդ՝ ծնվել է XI դարի 3—4-րդ տասնամյակում, գործել է շուրջ 1070—1100 թթ.:

2-րդ սերունդ՝ ծնվել է XI դարի 6—7-րդ տասնամյակում, գործել է շուրջ 1100—1130-ական թթ.:

3-րդ սերունդ՝ ծնվել է XI դարի վերջին—XII դարի առաջին տասնամյակում, գործել է շուրջ 1130—1160-ական թթ.:

Հաշվումներից պարզ է դառնում, որ Սարգիս II Մեծի հայրը՝ դիտական դրականությունից հայտնի Ջաքարե I-ը կամ հայ պատմիչների նշած Վահրամը, թերևս, առհասարակ որևէ կապ չի ունեցել Կյուրիկյանների հետ: Նա գործել է այն ժամանակահատվածում, երբ Տաշիր-Ձորագետին վաղուց արվեն տիրացել էին վրացիները: Սարգիս Մեծի պապը՝ արձանագրություններից հայտնի Ավագ Սարգիսը կամ հայ միջնադարյան պատմագրության մեջ հիշատակված Ջաքարիան, եղել է, հավանաբար, առաջինը, որը կապ է հաստատել ևրկրամասի նոր տերեր՝ Օրբելի իշխանների հետ: Նրա գործունեությունը բաժանվել է երկու փուլերի (շուրջ 1070—1113 կամ 1118—շուրջ 1130 թթ.), որոնցից միայն առաջինի ժամանակ նա կարող էր ծառայել Կյուրիկյաններին: Հետևաբար, Կյուրիկյանների և Ջաքարյանների միջև հիմնական կապերը վերագրելի են XI դարի վերջին երեսնամյակին, երբ ասպարեզի վրա էր Սարգիս Մեծի պապի հայրը՝ Վարդան Արևելցու անվանակոչած Սարգիսը կամ, ինչպես որ երկար ժամանակ նրան սխալմամբ անվանում էին գիտնականները՝ խոսրովը⁴⁷:

Այս նախնական հաշվարկներից հետո պետք է պարզել հետևյալը՝ ի՞նչ չափով են այդ ժամանակագրական ուղեհիշներին համապատասխանում Ջաքարյանների նախնիների գաղթի ժամանակի մասին հետազոտողների տեսակետները:

Այս առումով ամենակոնկրետ և ամենախոցելի թվականը նշում է Ջաքարյանների ծագման «Արծրունիական» տեսության հետևորդ Ս. Երեմյանը: Նրա կարծիքով, Ջաքարյանների նախնի խոսրովը 1048 թ. Մեծ Ջալ դետի կիրճում սելջուկների դեմ բյուզանդական զորքի տարած հաղթանակից հետո իր տոհմով անցել է Գուգարք և ճանաչել լոռու թագավորի գերիշխանությունը⁴⁸: Գիտնականը չի բացատրում, թե ինչու հենց այդ ժամանակ պետք է գաղթեին Ջաքարյանները, ի՞նչ կապ կա սելջուկների ու բյուզանդացիների միջև ճակատամարտի ու Ջաքարյանների տեղափոխության միջև, բայց առանը այդ էլ պարզ է, որ նրա մատնանշած տարեթիվը ճիշտ լինել չի կարող: Կարծեցյալ խոսրովը այդ ժամանակ դեռևս երեխա կամ պատանի պետք է լիներ, առ այդ՝ հեռու քաղաքական ասպարեզից:

Ջաքարյանների գաղթը դեպի Հայաստան 1044—1050, իսկ բնակություն հաստատումը Տաշիր-Ձորագետում՝ 1050—1063 թթ. է դնում Աս. Շահնազարյանը: Հենվելով Վարդան Արևելցու «առ թագաւորսն Ձորոյ գետին» արտահայտությունից վրա⁴⁹, հետազոտողը կարծում է, որ Ջաքարյանների տեղափոխությունը տեղի է ունեցել այնպիսի ժամանակահատվածում, երբ Տաշիր-Ձորագետում միաժամանակ թագավորել են երկու արքա, իսկ 1050—1063 թթ. երկրամասում հաստատապես թագավորել են Կյուրիկե և Սմբատ եղբայրները⁵⁰: Նախ՝ այդ հաշվարկների հիմքի, և ապա՝ հավանականության մասին: Աս. Շահնազարյանը անհետևողականություն է դրսևորում, երբ Վարդան Արևելցու վերորեբրյալ արտահայտությունը մեկնաբանելիս առաջին հերթին չի հենվում իր իսկ պատմիչի այլ տեղեկությունների վրա: Իսկ իրողությունն այն է, որ Վարդան Արևելցին վկայում է, թե Կյուրիկեն միայնակ է թագավորել: Փոխարենը, մատենագիրը համարում է, թե միասին են թագավորել Կյուրիկեի Աբաս և Դավիթ որդիները⁵¹: Հետևաբար,

47 Տե՛ս Ա. Ի. Շահնազարյան. Ջաքարյանների տոհմածագի հարցի շուրջ.—«Պատմա-մաթեմատիկական հանդես», 1985, № 3, էջ 204—209:

48 Տե՛ս Ս. Երեմյան. «Ջաքարյաններ» բառահոգված.—ՉՄԷ, հ. 3, Երևան, 1977, էջ 676:

49 Տե՛ս Վարդան Արևելցի, էջ 181:

50 Տե՛ս Աս. Շահնազարյան. նշվ. աշխ., էջ 73—74:

51 Տե՛ս Վարդան Արևելցի, էջ 141—142:

«Թագաւորսն» բառի այն մեկնարանումը, որն առաջարկում է Աս. Շահնա-զարյանցը, սկզբից ևեթ մերժելի է: Ակնհայտ է, որ պատմիչն այն անորոշա-բար է գործածել, այլապես նա չէր վարանի անվանել Կյուրիկյան կոնկրետ գահակալին, որոնցից բոլորի անուններն էլ, ի դեպ, նրան քաջահայտ էին: Եթե խնդրո առարկա արտահայտությունը անգամ բառացի ընկալենք, ապա այդ դեպքում, ելնելով հեղինակի իսկ վկայություններից, այն պարտավոր ենք վերագրել Աբաս և Դավիթ եղբայրներին, որոնք իշխել են Տաշիր-Ձորա-գետում մոտավորապես 1090—1113 թթ.:

Այժմ Աս. Շահնազարյանցի հաշվումների հավանականության մասին: Արդեն տեսանք, որ նա Ջաքարյանների ամեն մի սերնդին 40—45 տարվա կյանք է շնորհում և նրանց գաղթը գնում XI դարի առաջին կեսին: Բայց եթե, հետևելով հետադոտողին, ելակետ ընդունենք Սարգիս Մեծի մահվան տարեթիվը (1187) և հաշվենք մատնանշված չորս սերնդի կյանքի տևողու-թյունը ($4 \times 40 - 45 = 160 - 180$), ապա կստանանք 1027—1007 թթ., որոնք բավականաչափ հեռու են դարի առաջին կեսի ավարտին հարող 1044—1050 թթ.: Բայց ուսումնասիրողը հետագայում ևս հետևողական չի գտնվել հաշ-վումների մեջ: Ջաքարյանների գաղթի սկիզբը կամայականորեն 1044 թ ղնե-լուց հետո, նա տոհմի տեղափոխության վերին սահմանագիծ է ընդունում 1063 թ.: Բայց 1063 թ. ընդամենը այն վիժագիր արձանագրության տա-րեթիվն է, որտեղ միասին հիշատակվում է հետադոտողի նախընտրած Թա-գավորական զույգը՝ Կյուրիկեն ու Սմբատը⁵², Սակայն չէ որ ամենեկին չի քացառվում նրանց համատեղ կառավարումը նաև հետագայում: Հանգա-մանք, որը քաջ հայտնի է եղել նաև Աս. Շահնազարյանցին: Ջարմանալին այն է, որ նա անգամ մեջքերում է Հաղբատաձորի վիժագրերից մեկը, որ-տեղ Կյուրիկեն ու Սմբատը միասին են հիշատակվում նույնիսկ 1089 թ.⁵³, Բայց դա չի խանգարել ուսումնասիրողին հաջորդ իսկ էջում Կյուրիկեի ու Սմբատի համատեղ կառավարումը հանկարծակի ընդհատել 1063 թ.: Պատ-ճառը, անշուշտ, այն է, որ նա երկյուղել է չափազանց հեռանալ կամա-յականորեն կանխանշած ժամանակագրական ուղենիշներից: Հետևաբար, կարող ենք եզրակացնել, որ Աս. Շահնազարյանցի փաստարկներն ու հաշ-վարկները հեռու են համոզիչ լինելուց:

Ջաքարյանների տեղափոխությունը XI դարի 50—60-ական թթ. է թվա-գրել նաև Շ. Մեսխիան, սակայն նրա համար ելակետային են եղել այլ իրողություններ: Ուսումնասիրողը մշտնորոշ նշանակություն է տվել Հաղբատի արձանագրություններից մեկին⁵⁴, որտեղ, գիտություն մեջ լայնորեն տա-րածված կարծիքի համաձայն, հիշատակվում են Ջաքարյանների նախնիներ Ավագ Սարգիսն ու Խոսրովը: Այդ արձանագրության մեջ վկայված Հովհան-նես եպիսկոպոսի առաջնորդությունը թվագրելով XI դարի 50—60-ական թթ.՝ վրացի գիտնականը ենթադրել է, որ Ջաքարյանների նախնիները այդ դարի 60-ական թթ. ուշ չէին կարող տեղափոխված լինել Տաշիր-Ձորագետ⁵⁵, Սա-կայն, ինչպես վերջերս ցույց տվեց Ա. Ի. Շահնազարյանը, Հաղբատի վե-րոհիշյալ արձանագրությունը իրականում որևէ կապ չունի Ջաքարյանների հետ և փորագրվել է XIII դարում⁵⁶, Հետևաբար, Շ. Մեսխիայի եզրակացու-թյունը ևս, հիմնված լինելով անհավաստի փաստերի վրա, ընդունելի հա-մարվել չի կարող:

52 Տե՛ս Կ. Ղ ա ֆ ա դ ա Ր յ ա ն. Սանտհի վանքը և նրա արձանագրությունները, էջ 187:

53 Տե՛ս Աս. Շ ա հ ն ա զ ա Ր յ ա ն ց. Եջվ. աշխ., էջ 73:

54 Տե՛ս Կ. Ղ ա ֆ ա դ ա Ր յ ա ն. Հաղբատ, էջ 161:

55 Տե՛ս Շ. Մ ե ս խ ի ա. Եջվ. աշխ., էջ 231—232:

56 Տե՛ս Ա. Ի. Շ ա հ ն ա զ ա Ր յ ա ն. Եջվ. աշխ., էջ 208—209: Բնութագրական է, որ հե-ղինակը, համոզիչ կերպով պարզելով հանդերձ Հաղբատի խնդրո առարկա արձանագրության իրական ժամանակը, ինքը ևս XI դարի կեսերին է ենթադրում Ջաքարյանների նախնիների գաղթը (տե՛ս նույն տեղում, էջ 209):

Զաքարյանների կարծեցյալ գաղթի ժամանակի պարզաբանումը, որը սկզբունքային նշանակություն է ձեռք բերում այդ տոհմի հետագա էթնոմալկության բարդ էպիտոմայան խնդիրը արժարժեքիս, ցավալիորեն վրիպել է ընտանիքի թրդական ծագմանը և հայանալուն հավատացող հետազոտողների մեծ մասի ուշադրությունից: Նրանցից միայն Վ. Մինորսկին է հպանցիկ ենթադրել, որ Զաքարյանների՝ Սարգիս II Մեծին նախորդող սերունդը՝ Ավագ Սարգիս I-ը և Զաքարի I-ը «մեզ 1100 թվականից ետ հեռու չի տանի»⁵⁷, Մնացած հետազոտողներն ավելի զգուշավոր են գտնվել Զաքարյանների դաղթի ճշգրիտ ժամանակահատվածը մատնանշելու առումով և ավելի ընդգրկուն փուլ են ենթադրել⁵⁸:

Այնուամենայնիվ, անգամ Զաքարյանների ծագման տարբեր վարկածների հետևորդ դրեթե բոլոր հետազոտողները համակարծիք են գտնվել մի հարցում. նրանք, նույնիսկ «Բագրատունիական» ու «Արծրունիական» տեսությունների պաշտպանները, համոզված են, որ Զաքարյանների նախնիները դաղթել են Ձորագետ, նախապես ունենալով օտար էթնիկական կամ դավանական ծագում՝ միայն այստեղ հայանալով կամ վերագտնելով իրենց բուն ծագումը: Այսպիսով, մերօրյա հետազոտողներն անգամ դժվարացել են շեղվել Մովսես Խորենացու կանխորոշած ուղուց և հավատարիմ են մնալով միջնադարյան պատմագրության ոգուն:

Օրինակ, Զաքարյանների «թրդական ծագման» տեսությունը մերժելով հանդերձ, Ս. Նրեմյանը լիովին հետևել է խորենացիական կերպաձևերին: Նա նույնիսկ հարկադրված է եղել Արծրունիների «թրդացած ճյուղ» ենթադրել և ապա միայն այդ ընտանիքին գաղթեցնել Տաշիր-Ձորառեւ⁵⁹: Կամ՝ Կ. Տեր-Մկրտչյանը ջանքեր է թափել ապացուցելու, որ Զաքարյանների նախնիները Բագրատունիներ են եղել, բայց չգիտես ինչու անպայման Հարավային Հայաստանից և անվերապահորեն հարավից հյուսիս տեղափոխված⁶⁰: Եվ, վերջապես, նույնիսկ Ա. Շահնազարյանցի պրպտումների և Զաքարյաններին, «թրդեական» ծագում վերագրելու հիմքը ևս դարձյալ եղել է տոհմին անպայման «գաղթական» համարելու ձգտումը⁶¹:

Զաքարյանների էթնիկական ու սոցիալական ծագման խնդիրը արժարժեքիս, ժամանակագրական հարցերի լուսաբանությունից բացի, անհրաժեշտ է անդրադառնալ իրադարձությունների ժամկետան պատմաաշխարհագրական միջավայրին: Եթե մենք նույնիսկ անվերապահորեն հավատանք հայ պատմիչների հաղորդումներին և Զաքարյանների նախնիներին հիմարվի Տաշիր-Ձորագետ գաղթած թրդեր համարենք, դարձյալ չենք կարող խուսափել մի շարք հարցերի պարզաբանումից, որոնց մասին խոսք կլինի ստորև:

Ինչպես տեսանք, Զաքարյանների տեղափոխության ժամանակ է դիտվում XI դարի կեսերից մինչև XII դարի սկիզբը՝ ընկած, շուրջ վեց տաս-

⁵⁷ Տե՛ս V. Minorsky. Studies in Caucasian History. London, 1953, p. 102.

⁵⁸ Այս առումով հատկանշական է Հ. Մանանդյանի բնութագրումը. «Սրանք (Զաքարյանները—Հ. Մ.) դաղթել էին Ձորագետ, հավանաբար, XI դարում ...ընդունել էին այստեղ քրիստոնեությունը ըստ Հայոց եկեղեցու դավանանքի: Նրանք, ազգակցություն հաստատելով ամուսնությունների միջոցով հայերի հետ՝ հետզհետե հայացել էին» (տե՛ս Հ. Մանանդյան. Երկեր. Գ. Գ, Երևան, 1977, էջ 132, բնագծումն իմն է—Հ. Մ.):

⁵⁹ Տե՛ս Ս. Նրեմյան. Նշվ. աշխ.: Հեղինակին մտահոգություն չի պատճառել այնփաստը, որ Արծրունիները շարունակում էին լիովին հայ մնալ XI դարի 2-րդ կեսում ու հաշորդ դարերում, առանց քրդանալու կամ մահմեդականանալու: Ինչ վերաբերում է Կորճայքի Կարթունիք գավառին, որտեղի Արծրունիների «թրդացած» տոհմաճյուղի մասին դրում է գիտնականը, ապա այդքան վճռականորեն արտահայտված տեսակետի փաստական հիմքերը մեղի լիովին անհայտ են:

⁶⁰ Տե՛ս Կ. Տեր-Մկրտչյան. Նշվ. աշխ.:

⁶¹ Տե՛ս Ա. Շահնազարյան. Նշվ. աշխ.:

նամյակ ընդգրկող ժամանակաշրջանը: Ինչպե՞ս է հնարավոր գնահատել այդ փուլը Տաշիր-Ձորագետի Կյուրիկյան թագավորության պատմության համատեքստում, ի՞նչ ուղղվածություն ունեին ժամանակի էթնոգրավական ու լեզվական-մշակութային գործընթացները:

Առանց երկրային կարելի է պնդել, որ այդ տասնամյակները Կյուրիկյանների քաղաքական հզորության անկման տարիներն էին: Հայտնի է, որ XI դարի վերջին քառորդում այդ թագավորությունը ենթարկվում էր սելջուկ-թյուրքերի, Վրաստանի ու Գանձակի Շադադյանների ուժեղացող ճնշմանը: 1118 թ. Վրաստանը գրավեց Լոռեն և Հյուսիսային Հայաստանի այս հատվածում քաղաքական գերիշխանությունը հայերից անցավ վրացիներին⁶²: Տաշիր-Ձորագետում, էթնիկական պատկանելության փոփոխության համար, որը արտակարգ բարդ ու երկարատև գործընթաց է, անհրաժեշտ նախադրյալներ գոյություն չունեին նաև միատարր էթնիկական ու մշակութային միջավայրի առումով: Կյուրիկյանների թագավորությունում, հատկապես 1065 թ., երբ Սամշվելդեից Լոռե տեղափոխվեց մայրաքաղաքը, զգալի թիվ էին կազմում վրացիները: Այդ տարածքում նկատելի ազդեցություն ունեին վրաց եկեղեցիները: Բավական է ասել, որ Դավիթ Անհողինի (989—1048) օրոք անգամ, Կյուրիկյանների առավել հզորության շրջանում, Գագերդի տեր Դիմիտրի մարզպանը ձեռնարկեց զհալածության հայրենի հայրենիք և թիկունս օգնականի դերում արաբալ՝ ի նոցին կրկնամեծ լուսնայ ջուր և զորգին իւր՝ մամիուղ Տաշրաց կացուցանէր ի Հինէ վանս»⁶³: Այսպիսով, Տաշիրում անգամ վրացական թեմ հիմնադրվեց, և վրաց եկեղեցու դիրքերը XI—XIII դարերում անընդհատ ամրապնդվում էին: Այս դրույթի իրավացիության մասին են վկայում և՛ պատմողական աղբյուրները և՛ թե այդ դարերից հայտնի ու գերազանցապես Հյուսիսային Հայաստանում պահպանված վրացերեն արձանագրությունները⁶⁴: Հետևաբար, Տաշիր-Ձորագետում էթնիկական ու դավանական միջավայրն այնպիսին չէր, որպեսզի հնարավոր լինեին անվերապահ հավատ ընծայել Վարդան Արեւելցու՝ Ջաքարյանների նախնիների «հայանալու» տեսությանը:

Առկա տվյալները բավարար են նաև Ջաքարյանների դավանափոխության հավանականությունը կասկածի ենթարկելու համար: Հայտնի է, որ XI դարի 40-ական թթ. սկսված սելջուկյան արշավանքները էական տեղաշարժեր առաջ բերեցին Մերձավոր Արեւելքի քաղաքական, ինչպես նաև դավանական ու մշակութային կյանքում: Հաճախակի դարձան կրոնափոխության ու եկվոր տիրակալների հետ խնամիրանալու դեպքերը: Ընդ որում, այդ երևույթներն ունեին միակողմանի ուղղվածություն: Կրոնափոխության պարագայում քրիստոնյաներն է, որ մահմեդականություն էին բնորոշում, իսկ խնամիրանական կապերի հիմքում ընկած էր մահմեդական տիրակալներին աղբյուր տալու օրենքը արմատավորվող սովորությունը⁶⁵: Գաղտնիք չէ, որ շրկու երևույթն էլ պայմանավորված էին տեղական ավատատերերի քաղաքական ու տնտեսական շահերով: Այս առումով պերճախոս են անմիջականորեն Կյուրիկյաններին վերաբերող փաստերը: 1064 թ. Ալի-Արսլան սուլթանի հետ ամուսնացավ Կյուրիկյան արքայադուստրերից մեկը⁶⁶, իսկ չորս

62 Տե՛ս Հայ ժողովրդի պատմություն, էջ 471—473: Ռ. Մաթևոսյան. նշվ. աշխ., էջ 90—102: 2. Մարգարյան. Հյուսիսային Հայաստանի և Վրաստանի ժր դարի պատմության մի քանի հարցեր. Երևան, 1980, էջ 48—50:

63 Ասողիկ, էջ 257:

64 Տե՛ս Պ. Մուրադյան. նշվ. աշխ., էջ 18—24, 63—64, 185—189:

65 Ինչպես նշում է Մխիթար Գոշը, հայ իշխանները զոգստերս իւրեանց յայլազգիս յամուսնութիւն տային»՝ վերջիններից ռազմական օգնություն ստանալու ակնկալքով (տե՛ս Ղ. Ալիշան. Հայապատում. հ. Բ, Վենետիկ, 1901, էջ 387):

66 Տե՛ս Մատթեոս Ուռհայեցի. Ժամանակագրություն. Վաղարշապատ, 1898, էջ 145: Փարթևս ցխովրերա, հ. 1, էջ 307:

տարի անց հայրենի հավատը ուրացավ Կյուրիկյանների տոհմի Կախեթի ճյուղից Աղսարթանը: Երբ 1068 թ. սելջուկները հերթական անգամ ներխուժեցին Անդրկովկաս, Աղսարթանը, որը հայրական գծով Դավիթ Անհողինի թոռն էր, իր տիրույթները պահպանելու համար միացավ նրանց և մահմեդականություն ընդունեց⁶⁷: Հետևաբար, իրական փաստերը ցույց են տալիս, որ դժվար է խոսել Զաքարյանների նախնիների կրոնափոխության և հայադավան գաղնալու մասին հենց այն ժամանակաշրջանում, երբ հակառակ ուղղվածության գործընթացներ էին տեղի ունենում:

Էթնոկրոնական գործընթացների մասին խոսելիս չպետք է աչքաթող անել մասնակից էթնոսների առանձնահատկությունների պարագան: Առայժմ խոսքը վերաբերում էր հայ էթնոսին, Տաշիր-Ձորագետում նրա ունեցած դիրքերին ու հարևան ժողովուրդների հետ փոխազդեցություններին: Իսկ հիմա Հայաստանում քրդերի առկայության ու էթնիկական ինքնատիպության մասին: Քաջահայտ է, որ քրդական տոհմերից IX—XI դարերում Հարավային Հայաստանում ազդեցիկ դիրքեր ունեին Մովսեսյանները, XII դարի վերջում—XIII դարի սկզբում՝ Այուրյանները, իսկ Հյուսիսային Հայաստանում X—XIII դարերում՝ Շաղադյանները: Վերջիններս իշխում էին Դվինում և Կյուրիկյանների անմիջական հարևանությամբ գտնվող Անիում: Ինչպես ցույց է տալիս վրացական աղբյուրներում պահպանված «Քուրդվաճառ» տեղանունը⁶⁸, հնարավոր է, որ քրդական էթնիկ հատված էր ապրում նաև Կյուրիկյաններին պատկանող Դեբեդ-Ձորագետի հովտում: Զգալի թվով քրդեր էին ապրում, ընդ որում X դարից ոչ ուշ, նաև Անդրկովկասի տարբեր մասերում, մասնավորապես Դվինում, Արաքսի ափին, Առանում, Դեբեդում⁶⁹: Այսպիսով, քրդական տարրը Հայաստանի որևէ մասում մեկուսացած չի եղել: Կարող, քանի որ այն առկա էր երկրի տարբեր հատվածներում, այդ թվում Տաշիր-Ձորագետում ու նրա մատույցներում: Բացի այդ, այն երբեմն քաղաքականապես ավելի հզոր էր ու կազմակերպված, քան բուն հայկական բնակչությունը: Հայոց միջավայրում քրդերը դիտվում էին մահմեդականության նվիրյալ կրողներ և այդպիսով ավելի էր ընդգծվում նրանց «օտար» լինելը:

Զաքարյանների նախնիների հայացման հավանականության հարցը բազմակողմանիորեն քննարկելիս անհրաժեշտ է պատշաճ ուշադրություն դարձնել քրդական էթնոսի ինքնատիպության վրա: Հանրահայտ է այն հսկայական դերը, որ քրդական հասարակության կյանքում դարերի ընթացքում խաղացել են ցեղային կազմակերպությունը, ինչպես նաև առանձնահատուկ տնտեսավարությունը: Այդ էթնիկական յուրահատկությունները օտար միջավայրում հույժ կարևոր էթնոպահպանիչ գործոնի դեր են կատարել: Թե որքան ազդեցիկ են եղել ցեղից չառանձնանալու և ուղղմական գործով զբաղվելու ավանդույթները, համոզիչ կերպով ցույց է տալիս Շաղադյանների օրինակը, որի ողիսականը Հայաստանում՝ հիանալի պատմական զուգահեռ կարող է ծառայել, եթե քրդական ազդեցիկ ընտանիքի հետագա ճակատագիրը տեսականորեն կերպաձևելու (մոդելավորելու) փորձ ձեռնարկենք:

Շաղադյանները, ինչպես որ Զաքարյանների նախնիների մասին է ասվում, Հայաստան էին տեղափոխվել ու ծառայության անցել հայ տիրակալի մոտ: Ըստ արաբական ու հայկական միմյանց լիովին համաձայն ու փոխադարձաբար լրացնող տեղեկությունների, առաջին Շաղադյաններից՝ Լաշարին 955—965 թթ. գտնվում էր Դիրզուրի (Վայոց Ձոր) հայ իշխանի

⁶⁷ Տե՛ս Քարթլեի ցիստերա, հ. 1, էջ 309; Садр ад-Дин ал-Хусайни. Ахбар ад-даулат ас-Селджукиа. М., 1980, с. 54—55:

⁶⁸ Տե՛ս Քարթլեի ցիստերա, հ. 2, էջ 50—51:

⁶⁹ Տե՛ս The Encyclopaedia of Islam. Vol. V, Leiden, 1981, p. 450.

բանակում⁷⁰։ Ավելի վաղ, երբ անհաջողության էր մատնվել Դվինին տիրելու նրա հոր փորձը, Լաշքարին ու եղբայրները որոշ ժամանակ ապրել էին Վասպուրականի Արծրունիների մոտ։ Այսպիսով, Լաշքարին երկար տարիներ էր անցկացրել հայկական միջավայրում, բայց փաստ է, որ նա չէր փոխել ոչ դավանանքը, ոչ էթնիկական պատկանելությունը։ Դեպքերին ժամանակակից արաբ հեղինակի խոստովակալությունները օգնում են պարզելու էթնիկական ինքնագիտակցության շխմբելու պատճառները։ Հարցն այն է, որ Շադդադյանները չէին խղել իրենց կապերը ցեղակիցների հետ։ Ըստ պատմիչի, Լաշքարիի հայրը 951 թ. սկսեց իշխել Դվինում թիւ ընտանիքի, տոհմի և հետևորդների փոքր խմբի հետ⁷¹։ 954 թ. նա ժամացավ իր ընտանիքին, որդիներին ու տոհմին՝ Վասպուրականում, իսկ Լաշքարիի թիւխանության տևողությունը միայն իր ցեղի վրա 24 տարի էր, իսկ իր ցեղի և Գանձակ քաղաքի ու նրա բոլոր գավառների վրա՝ 8 տարի⁷²։ Եթե նկատի ունենանք, որ վերոհիշյալ 24 տարիների մեջ են մտնում նաև հայ իշխանի մոտ անցկացրած տարիները, ապա պարզ է դառնում, որ ցեղակիցների խումբը մշտապես ուղեկցում էր իր ղեկավարին, Շադդադյանները անքակտելի միասնություն էին կազմում սեփական ցեղային միավորման հետ։ Այն, լինելով ռազմիկների կազմակերպություն, հակադրվում էր տեղական նստակյաց հողագործ բնակչությանը։ Իրավիճակը բնութագրելու տեսանկյունից հատկանշական են այն խոսքերը, որոնցով, ըստ արաբ հեղինակի, Լաշքարիին դիմեց կրտսեր եղբայրը, երբ համոզում էր թողնել հայ իշխանի մոտ ծառայությունը. «Ով իմ ամիրա եղբայրս, արդյոք ժամանակը չի՞ եկել, որ դու հրաժարվես հողագործ անհավատների ծառայությունից և առավոտ երեկո խոզերի հետ անցկացնելուց ու ազանի փոխարեն զանգերի ձայնը լսելուց»⁷³։ Այսպիսով, ինչպես երևում է X դարի կեսերից մինչև XII դարի դարի վերջը Դվինում ու Անիում իշխող Շադդադյանների օրինակից, քրդական ընտանիքը լիովին ի վիճակի էր նույնիսկ այդքան երկար ժամանակաշրջանում հաջողությանը դիմագրավելու հայկական միջավայրի ազդեցությունը։

Վերադառնալով Զաքարյանների նախնիներին, վերադառնալով «Բաբիրական խել» արտահայտությանը և այն քրդական ցեղանուն ընկալելու փորձերին։ Զաքարյաններին կոնկրետ քրդական ցեղից սերելիս, թվում է, դժվարություն չպետք է ծագեր, քանի որ քրդական ցեղանունները լավ են պահպանվել, դրանք վաղուց ցուցակագրված և բավականաչափ սպառիչ կերպով ուսումնասիրված են։ Ուստի «Բաբիրական խել»-ի ու քրդական պատմական կամ ներկա ցեղի նույնացումը պետք է դուրսին լինելու։ Սակայն այդ խնդիրը դժվարություններ է պատճառել անգամ այնպիսի հեղինակության, ինչպիսին ականավոր քրդագետ, արևելագետ Վ. Մինորսկին էր։ Ի հաստատումն Զաքարյանների քրդական ծագման ավանդության, գիտնականը բերում է «Babirani» անվան՝ քրդերի մեջ տարածված լինելու փաստը, իսկ այնուհետև ավելացնում է, որ «Pirani» ցեղախումբ (clan) գոյություն ունի Մանդուր ցեղային միության կազմում⁷⁴։ Բավականաչափ համոզիչ են, արդյոք, մատնացուցված իրողությունները։ Նախ՝ «Բաբիրան»-ը ցեղանուն չէ, այլ ընդամենը անձնանուն, այն էլ ոչ նույնական «Բաբիրական»-ին։ Այնուհետև, եթե Վ. Մինորսկին «Բաբիր» անվանումից հետո աննկատե-

⁷⁰ Տե՛ս V. Minorsky. Op. cit., p. 12. Ա. Տեր-Ղևոնդյան. Մանաչչիմ-Բաշիի անանուն աղբյուրը. Դվինի և Գանձակի Շադդադյանների մասին. — «Բանբեր Մատենադարանի», № 6, Երևան, 1962, էջ 478, հմմտ. Վարդան Արևելցի, էջ 134։

⁷¹ Տե՛ս V. Minorsky. Op. cit., p. 8—16. Ա. Տեր-Ղևոնդյան. նշվ. աշխ., էջ 476—480։

⁷² Տե՛ս V. Minorsky. Op. cit., p. 14. Ա. Տեր-Ղևոնդյան. նշվ. աշխ., էջ 479։

⁷³ Տե՛ս V. Minorsky. Op. cit., p. 102.

լիորեն շանյներ ժիրանս-ին, ապա Քարթրական-ի Փիրան զուգահեռ շատ ավելի անհամոզիչ կարող էր թվալ։ Շարունակելով Վ. Մինորսկու տեսակետի քննությունը, դժվար չէ նկատել ևս մեկ անհարիրություն։ Ձաքարյանների նախնիներին համարելով «Միջագետքի քրդեր», նա միևնույն էջում «Խաբիրական խել»-ի նախահիմք է համարում Փիրան ցեղախումբը, որը, ինչպես հայտնի է, գտնվում է Իրանական Քրդստանում⁷⁴։

Դժվար է Վ. Մինորսկու հետ համաձայնել նաև Քարթրական խել արտահայտության երկրորդ բաղադրիչի թարգմանության հարցում։ «Խել» քրդերին բառի իմաստի արտահայտումը «tribe» բառով, որոշակի իմաստային խտնաշփոթ կարող է առաջ բերել։ Որքան էլ դժվար է քրդական հասարակությանը բնորոշ ինքնատիպ հասկացությունների հաղորդումը այլ լեզուներով, այնուամենայնիվ կասկածի ենթակա չէ հետևյալը։ Սովորաբար, քրդական ցեղը՝ «աշիր»-ն կազմված է որոշակի թվով «թիր»-ներից կամ «թայֆա»-ներից, իսկ վերջիններս էլ, իրենց հերթին, բաժանվում են բազմաթիվ «խել»-երի։ Վերջիններից ամեն մեկը բաղկացած է 20—30 վրանից կամ տնտեսությունից, որոնք միավորված են ինչպես տնտեսական, այնպես էլ ընտանեկան կապերով⁷⁵։ Ուրեմն «խել»-ը քրդական հասարակության կառուցվածքում ամենափոքր միավորումն է և անհնար է այն ցեղ համարել։ Ստացվում է, որ Քարթրական խել-ը ցեղային ստորաբաժանման անվանում ընկալելու պարագայում բախվում ենք խիստ անհավանական իրավիճակի հետ։ Հայ պատմիչները սխալ և խառնաշփոթ են ներկայացնում Ձաքարյանների նախնիների տոհմածառը, հստակ չեն պատկերացնում ներառյալ Հայաստան տեղափոխվելու ժամանակահատվածը, բայց առեղծվածային ճշգրտություն են ցուցաբերում տոհմի նախնիների տնտեսական-ընտանեկան ամենասկզբնական ընդհանրության մատնացումն հարցում։ Հնարավոր է, արդյոք, այդ հստակատեսությունը բացատրել Ձաքարյանների ընտանեկան ավանդություններով։ Այս հարցին ակնհայտորեն բացասական պատասխան է սպասում։ Եթե XIII դարի 60-ական թթ., այսինքն՝ ընդամենը մեկ դար հետո, Ձաքարյանների սերունդները անկարող էին ճիշտ հիշել իրենց ամենանշանավոր նախնու՝ Սարգիս Մեծի, հոր ու պապի անունները, ապա ինչպե՞ս էին նրանք անսխալ մատնանշելու իրենց հեռավոր նախնիների ոչ թե ցեղի կամ «թիր»-«թայֆա»-ի, այլ ուղղակի «խել»-ի անունը։ «Խել» բառի միակ վկայությունը բովանդակ հայ մատենագրության մեջ, թվում է, բավականաչափ հստակորեն ցույց է տալիս, որ գործ ունենք հեղինակային ինքնատիպության դրսևորման հետ։ Ցանկանալով ընդգծել Ձաքարյանների քրդական արմատները՝ Կիրակոս Գանձակեցին, ամենայն հավանականությամբ, գիտակցաբար է դիմել «խել» բառին։ Փոխարենը այդ հասկացությունը դժվարացել է ըմբռնել անդամ նրա դասընկեր Վարդան Արևելցին, որն ուղղակի բաց է թողել Քարթրական խել արտահայտությունը։ Ինչ վերաբերում է Կիրակոս Գանձակեցու հաղորդումը վերաշարադրող Ձաքարիա Սարկավազին, ապա նա, ելնելով ավանդության կառուցվածքից ու սյուժեի տրամաբանությունից, «խել» բառն ըմբռնել է «երկիր, կողմ» առումով։

Ավարտելով քննությունը, կարելի է արձանագծել հետևյալը։ Ձաքարյանների ծագման չորս վարկածներից և ոչ մեկը իրողությունների համաժամանակյա, հավաստի ու անաչառ հավաստագրում չէ։ Խիստ ակնբեր են այդ տեսությունների քաղաքական միտումներն ու գաղափարախոսական-մատենագրական ակունքները։ Ուսումնասիրողներին մնում է եզրակացություննե-

⁷⁴ Shtum Encyclopaedia Iranica. Vol. III, London and New-York, 1989, p. 234; A. M. Ментешавили, Курды, М., 1984, с. 82:

⁷⁵ Shtum The Encyclopaedia of Islam. Vol. V, p. 470—471; A. M. Ментешавили, Указ. соч., с. 72—73.

քի հանգեւ աներկրայելիորեն ստույգ փաստերի հիման վրա, ձերբազատվելով միջնադարյան ավանդույթից՝ ազդեցությունից:

XII դարում, երբ Զաքարյանների տոհմը առաջին անգամ ազդեցիկ դեր սկսեց խաղալ Հայաստանի ու Վրաստանի քաղաքական կյանքում, այն ուներ շեշտված հայկական դիմագիծ (անձնանուններ, միաբնակություն, խնամիրական կապեր և այլն): Բացի այդ, ընտանիքի անդամները ժամանակակիցների աչքում համարվում էին հայ պետականությունը շարունակողներ՝ իշխաններ Վառոգ ազգատոհմիս⁷⁶, ինչպես նաև հայոց եկեղեցու հովանավորներ: Ժամանակակիցներից մեկի բնորոշմամբ, «յետ տարածամ փոխելոյն առ Քրիստոս մեծին Զաքարիայի, որ և խաւար գործեաց աշխարհիս Հա[ւ]ոց, բարենշան նորին շառաւղն պա[լ]ազատն եւ մնացորդն ազգիս ... յուսաւորեալ փաբատեաց զմառախղապատ խաւարն, զոր ի զրկմանէ հաւր նորա մածեալ ունէր զեկեղեցիս Հայաստանեաց»⁷⁷, Հակառակ Իվանեի քաղկեդոնական լինելու պարագային, որպես հայոց եկեղեցու պաշտպաններ երկու եղբայրներին էր դիմում Մխիթար Գոշը⁷⁸: Ոչ պակաս կարևոր են այն վկայությունները, որոնք, Զաքարյանների դավանական առումով հայությունից զատ, շեշտում են նրանց էթնիկական հայ լինելը: «Իշխանք երկու հայասեռք՝ եղբարք միմեանց»՝ այսպես է բնութագրում Զաքարե II-ին և Իվանե I-ին 1204 թ. Հռոմկլայում գրված ձեռագրի գրիչը⁷⁹: Փառապանծ եղբայրների մասին խոսելիս նույն հանգամանքի վրա սեեռուն ուշադրություն է հրավիրում նաև Մխիթարե Աստուծո ժամանակագրության հայերեն թարգմանությանը կից տարեգրական բնույթի երկի հեղինակը՝ «որ էին ազգաւ Հայք»⁸⁰: Ավելի կարևոր ենք համարում ականավոր պատմիչ Ստեփանոս Օրբելյանի վկայությունները: Նա հետևյալն է գրում XII դարի վերջի Զաքարյանների մասին. «Բայց յետ վախճանին Գէորգի թագաւորին Թամարն մեծարեալ զորդիսն Սարգսի՝ որդւոյ Զաքարէի իշխանի, եւայ ազգաւ և ուղղափառ եւաւառաւ, զԶաքարե և զԻւանէ, և բարձրացուցանէ ի պատիւ»⁸¹: Ինչպես կարելի է համոզվել, ընդգծված արտահայտությամբ միջնադարյան հեղինակը հստակորեն սահմանազատում է էթնիկական ու դավանական պատկանելությունը և շեշտում երկու առումով էլ Զաքարյանների լիարժեք հայությունը: Այսպիսով, Զաքարյանների մեզ ծանոթ առաջին սերունդների էթնոմշակութային նկարագիրը, ինչպես նաև անմիջական ժամանակակիցների ուղղակի ցուցումները տոհմի հայկական ծագումը և պատկանելությունը կասկածի ենթարկելու որևէ հիմք չեն ընձեռում:

Ուսումնասիրության ներկա փուլում առկա փաստերից կարելի է Զաքարյանների սոցիալական ծագման մասին անել հետևյալ հավանական եզրակացությունը: Տոհմի տարեգրությունից երևում է, որ մինչև 1176—1177 թթ.՝ Օրբելյանների գլխավորած ապստամբությունը, որից հետո միայն սկսվեց Զաքարյանների գլխավորությամբ բարձրացումը, Սարգիս II Մեծի տոհմաճյուղը

⁷⁶ Տե՛ս Գիվան հայ փիմագրության, I, էջ 14:

⁷⁷ Հայերեն ձեռագրերի հիշատակարաններ. ԺԳ դար, էջ 178:

⁷⁸ Տե՛ս «Արարատ», 1900, էջ 497:

⁷⁹ Տե՛ս Հայերեն ձեռագրերի հիշատակարաններ. ԺԳ դար, էջ 89:

⁸⁰ Տե՛ս Մխիթարե Աստուծո. Ժամանակագրություն. Երուսաղեմ, 1870, էջ 526:

⁸¹ Ստեփանոս Օրբելյան. Պատմութիւն տանն Սիսական. Մոսկվա, 1861, էջ 237: Նախադասության կառուցվածքն այնպիսին է, որ դժվար է ասել, թե Զաքարյանների հիշատակված երեք սերնդից որի՞ն են վերաբերում ընդգծված բառերը: Ամենից հավանականն այն է, որ այդ բնութագրմամբ պատմիչը վերադառնում է նախադասության սկզբին և դարձյալ խոսում է Սարգիս II-ի որդիների մասին: Մյուս կողմից, դժվար է ենթադրել, որ դավանական հարցերում անշափ զգայուն հեղինակը կարող էր մոռացության մատնել Իվանե I-ի: Դավանափոխությունը Ուստի, կարծում ենք, ընդլայնումը վերաբերում է տոհմի երեք սերնդին էլ հավասարապես:

պատկանել է ավատատերերի միջին շերտի վերնախավին: Ընդ որում, եթե Սարգիս Մեծը նկատելի դեմք էր Հյուսիսային Հայաստանում և Վրաստանում գեոեա XII դարի 60-ական թթ., ու էարող էր «իշխան» համարվել⁸², ապա նրա եղբայր Վահրամի սերունդները շարունակում էին սովորական «ազնուր», — «աղասու» ճանաչվել նույնիսկ այդ հարյուրամյակի 90-ական թթ. սկզբին⁸³, Տոհմի հնագույն և փայլուն ծագման առաջին դրույթները կարող էին ի հայտ գալ միայն XII դարի վերջին տասնամյակում — XIII դարի սկզբում, երբ Սարգիս Մեծի որդիները բարձր դիրք էին ձեռք բերել վրաց արքունիքում: Այդ ժամանակաշրջանում էլ պետք է սկիզբ առնեի տոհմի անցյալը շրջանցելու ձգտումը, որն արտացոլված է, օրինակ, Թամար Թագուհու երկրորդ պատմիչի երկում: Նա, խոսելով Ջաբարե II-ի և Իվանե I-ի բարձրացման մասին գրում է. «Տոհմով հավատարիմ արքաներին, այդ պատճառով էլ մեծապես սիրված հենց Թամարի պապերից և հայրերից»⁸⁴, այսինքն շեշտում է Ջաբարյանների կապերը անմիջականորեն վրաց Թագավորների հետ: Պատմիչի պնդման միտումնավորությունը ակնհայտ է: Ինչպե՞ս է հնարավոր խոսել Գեորգի III-ի, Թամարի հոր դեմ ուղղված խոշոր ապսաամբության մասնակիցների տոհմական հավատարմության մասին: Կամ՝ ինչպե՞ս կարող էր Սարգիս II-ը, «Օրբելիների եղբայրը և սիրելին»⁸⁵, շրջանցել իր ամենազոր «պատրոն»-ին և, խախտելով ավատատիրական հնթակարգությունը, կապեր հաստատել Վրաստանի Թագավորի հետ: Ընտանիքի դիրքերը ավելի համեստ պետք է լինեին XII դարի սկզբին, երբ Ջաբարյանները տիրում էին գավառական խոժոռների ամրոցին⁸⁶: Հետևաբար, սոցիալական ծագմամբ Ջաբարյանները հասարակ հայ ազնվականներ էին, նախ Կյուրիկյանների, ապա Օրբելիների ստորականներ:

ПРОИСХОЖДЕНИЕ ЗАКАРЯНОВ

А. Г. МАРГАРЯН

Резюме

В средневековых источниках происхождение знаменитого княжеского рода Закарян (XI—XIV вв.) представлено четырьмя версиями. Историографический анализ показывает (см. «Историко-филологический журнал», 1992, № 2—3), что первая — приписывающая Закарянам курдское происхождение, была сконструирована по модели Мовсеса Хоренаци. Продолжая историографическую традицию, армянские авторы наделяли Закарян «иностранным», «древним» и «высоким» происхождением. Аналогичных идеологических принципов придерживался также грузинский автор, первый историк царицы Тамар. По его мнению, Закаряны — потомки Ахемендского царя Артаксеркса I Долгорукого. Остальные две версии, связывающие Закарян с армянскими царскими династиями Багратуни и Арцруни, выдвинуты самими Закарянами и носят отпечаток их политических программ и притязаний. Комплексный анализ политических, этно-конфессиональных и языково-культурных реалий показывает, что теория о переселении предков Закарян в армянское царство Кюрикианов во второй половине XI — в начале XII вв. не выдерживает критики. Есть все основания полагать, что Закаряны XI—XII веков этнически были армянами (հայասն, հայ ազգաւ), а в социальном отношении — обычными «азатами» — «азнаурами», вассалами сперва Кюрикианов, а затем — князей Орбели.

⁸² Վարդան Արեւելցի, էջ 166: Ստեփանոս Օրբելյանը «իշխան» է կոչում նաև Ջաբարե I-ին (տե՛ս Ստեփանոս Օրբելյան, Պատմութիւն, էջ 287), բայց դժվար է պնդել, թե այդ բնութագրումը հշգրիտ է:

⁸³ Տե՛ս Բարթիս ցխովրեբա, հ. 2, էջ 51:

⁸⁴ Տե՛ս նույն տեղում, էջ 123:

⁸⁵ Տե՛ս նույն տեղում, էջ 19:

⁸⁶ Տե՛ս Վարդան Արեւելցի, էջ 181: